

Inatsisartut aalajangiiffigisassaattut siunnersuut, Naalakkersuisut peqquneqassasut misissuissasut Royal Arctic Line Kalaallit Nunaannut avammullu assartuinissamut sullissinissamik akuersissutaata atuukkunnaarsinneqassappat pitsaaqutissai ajoqqutissaalu, taamatuttaarlu assartuinnermut unammilleqatigiinneq eqqullugu. Misissuineq takussutississavaa sullissinissamik akuersissut peerlugu unammilleqatigiinnermillu eqqussineq aningaasatigut kingunissai qanoq isikkoqarnersut. Misissuineq Inatsisartunut UKA 2023 nallertinnagu tunniunneqassaaq. (Ineqarnermut Attaveqaasersuutinullu Naalakkersuisoq)

Akissuteqaat

(Ineqarnermut Attaveqaasersuutinullu Naalakkersuisoq)

Aappassaaneerpeqarnera

Sanaartornermut Ataatsimiititaliami ilaasortat immikkoortumik suliarinnilluarsimanerinit, Royal Arctic Linellu assartuinnermi kisermaassisuunerata misissorneqarnissaanik siunnersuummut isumaliutissiissutaannut Naalakkersuisut aallarniutigalugu qujapput.

Naalakkersuisut allannguutissatut siunnersuutigisaannut Sanaartornermut Ataatsimiititaliaq tapersiimmat nuannerpoq, misissuinnermilu inernerit tamassinnut saqqummiunnissaannut qilanaarpunga.

Immikkoortup matumap siullermeerpeqarnerani Naalakkersuisuni ilaasortat ataasiakkaat Tunumi inoqarfiit pilersorneqarnerat eqqartorpaat. Tassunga tunngatillugu massakkut pilersuineq innuttaasut naammaginngikkaat oqaatigineqarpoq.

Inoqarfiit pilersorneqarnerat Naalakkersuisut pingaartittorujussuaat. Kingullertigut saaffiginnissutit Ittoqqortoormiunut pilersuinerit pillugit, Royal Arctic Line oqaloqatigaara, Royal Arctic Linelu paasinnilluarlunilu suleqataarusuppoq. Silap pissusaata allanngoriartorneratigut imaatigut angallannissamut periarfissagissaarnerulissappat, innuttaasunut sullissineq pitsannorsarumallugu imaatigut angallassineq pitsannorsarneqarsinnaassanersoq misissorneqassasoq Naalakkersuisut ersarilluinnartumik aallaavigaat.

Tamanna pillugu oqallilluarnermut Inatsisartut qutsavigaakka, taamatullu oqaaseqarlunga allannguutissatut siunnersuutit saqqummiussaq Naalakkersuisut sinnerlugit akuereqqullugu inassutigaara.